



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Parlamentu Nasional
07 Abril 2016

Bankada CNRT afirma krime transnasionál, korupsaun, krime graves no krime violasaun hasoru fetu no labarik laiha direitu ba Indultu

Iha 07 Abril 2016, ekipa JSMP halo audénsia ho distintu deputadu, Sr. Natalino dos Santos, nu'udar Xefe Bankada CNRT, hodi apresenta no diskute JSMP nia pareser sira kona-ba Proposta Lei Indultu.

Audensia ne'e halo ho objetivu atu apresenta no hato'o hanoin sira kona-ba Proposta Lei Indultu ba Bankada CNRT hanesan partidu mais votadu, liu-liu kestaun sira kona-ba Prezidente da Repúblika bainhira ezerse ninia kompetensia hodi fo indultu ba kondenadu sira.

“JSMP hanoin katak mekanismu lejislativu ida atu administra prosesu oinsa Prezidente ezerse nia kompetensia konstitusional atu fo indultu ne'e importante tebes, liu-liu atu asegura katak ezerseiu kompetensia konstitusional ne'e, lakontra-productivu fali ho esforsu ne'ebé instituisaun judisiáriu sira hala'o hela” dehan Luis de Oliveira Sampaio, Diretór Ezekutivu JSMP.

JSMP hanoin katak lei indultu ne'e la'os atu limita Prezidente ninia kompetensia ne'ebé garantidu iha artigu 85 Konstituisaun, maibé lei indultu ne'e iha hodi limita kondenadu sira nia direitu. Tanba ne'e mak JSMP hola inisiativa ne'e hodi halo audensia ho Bankada sira atu bele hetan ideas no fo apoiu ba hanoin sira husi JSMP ne'ebé elabora liuhosi JSMP nia paraser ba Komisaun A, Parlamentu Nasional.

Xefe Bankada Sr. Natalino dos Santos, agradese tebes ba JSMP, tanba bele apresenta kestaun importante ne'e ba Bankada CNRT. Hanesan deputadu nia iha pozisaun ne'ebé klaru no koresponde ho JSMP nia pozisaun. Klaru katak Prezidente Republika iha poder konstitusional hodi fo indultu, maibé tuir nia

presiza iha lei espesifiku hanesan lei indultu nune'e bele quia Prezidente da Republika bainhira ezerse ninia poder hodi fo indultu.

Xefe Bankada ne'e afirma katak Bankada CNRT konkorda no sei la-tolera ba krime sira ne'ebé JSMP apresenta hanesan krime transnasionál, krime graves, krime violasaun hasoru fetu no labarik no krime korupsaun. Tanba bainhira krime sira ne'e mak nafatin hetan indultu ne'e klaru sei fo imazen ladiak ba povu no estadu direitu demokrátiku.

Nia hanoin katak Bankada CNRT apoiu tomak hanoin sira husi JSMP atu krime hirak ne'e labele hetan fatin ba indultu. Maske nune'e nafatin depende ba Prezidente da Republika no tribunál hodi hare fali lei ne'e ninia konstitusionaliade.

JSMP hanoin katak lei ne'e la'os atu limita poder prerogativu Prezidente da Republika nian hodi fo indultu ba prizioneiru sira, maibé lei indultu ne'e importante hodi bele limita kondenadu sira atu hetan direitu ba indultu.

JSMP mos hanoin atu prosesu indultu ka kualker forma ne'ebé Prezidente utiliza tenke iha opsaun atu hamenus pena gradualmente, la'os hasai totál hosi prizaun hanesan prátika sira ne'ebé durante ne'e akontese. Ida ne'e sei ajuda publika sira atu labele hanoin, interpreta no iha persepsaun katak justisa ba ema kiik de'it,

Tuir planu audénsia hanesan sei halo mós ho Bankada Fretilin.

Atu hetan informasaun kle'an liu tan favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Telefone: 3323883|77295795

Website: www.jsmp.tl

Facebook: www.facebook.com/timorleste.jsmp

info@jsmp.minihub.org

Twitter: @JSMPtl